



10. juni 2026

UPA2026/55

Nunat Avannarliit Killiit Siunnersuisoqatigiiffiata kaammattuutitut aalajangersagaanik nr. 1/2025-mik Inatsisartut ilaliinissaannik siunnersuut:

Nunat Avannarliit Killiit Siunnersuisoqatigiiffiata Savalimmiuni naalakkersuisunut, Kalaallit Nunaanni naalakkersuisunut Islandimilu naalakkersuisunut kaammattuutigaa,

• **Nunani avannarlerni killerni taakkulu akornanni ullumikkut sillimaniarnermut illersornissamullu tunngavigisat nassuiaateqarfigeqqullugit,**

• **Nalilersoqqullugu nunani avannarlerni killerni sillimaniarneq pillugu suleqatigiinneq qanoq ineriartortinneqarsinnaanersoq kivinnekarsinnaanersorlu nunani avannarlerni killerni nunani innuttaasut toqqissimasumik ataqqinassusilimmillu inuuneqarsinnaalersillugit.**

(Aallartitat siulittaasuat Pipaluk Lyngø, Inuit Ataqatigiit)

Nunat Avannarliit Killiit Siunnersuisoqatigiiffiata kaammattuutaannut 1/2025-imut saqqummiunneqartumut Siumut sinnerlugu qujanaq.

Siumumiit pitsaasutut isigaarput Nunat Avannarliit Killiit Siunnersuisoqatigiiffiata kaammattuutaa, tassa Nunat Avannarliit Killiit akornanni isumannaallisaanikkut illersornissakkullu tunngavigineqartut pillugit erseqqinnerusumik paasisaqarnissamik kiisalu Kalaallit Nunaata, Savalimmiut Islandillu akornanni suleqatigiinnerup nukittorsarneqarsinnaaneranik misissuinissamik siunertaqartumik.

Ukiuni kingullerni Issittumi Atlantikullu Avannaani sillimaniarnikkut inissisimaneq annertuumik allangoriartorpoq. Taamaattumik pingaaruteqarpoq Kalaallit Nunaat nunatta immikkoortortaqarfiata iluani isumannaallisaaneq aalajaassuserlu pillugit oqallinnernut peqataalluartaasasoq. Kalaallit Nunaannut tunngasut pillugit aalajangiinerit Kalaallit Nunaat avaqqullugu pinnatik, kisiannili Kalaallit Nunaat peqatigalugu pisassapput.

Siumumiit Naalakkersuisut akissuteqaataat maluginiarparput, tassani oqaatigineqarmat illersornissaq sillimaniarnerlu suli naalagaaffiup suliassaqarfianit annertuumik suli akisussaaffigineqarmata. Tamatumunngali peqatigitillugu Kalaallit Nunaat nunatsinnut pingaaruteqartunik oqallinnernut aalajangiinnernullu annertusiartuinnartumik peqataatinneqartalersimasoq. Tamannami pisariaqartoq eqqortuusorlu isumaqarpugut.

Taamatutaaq Naalakkersuisut naliliinerat isumaqatigaarput, tassalu sillimaniarneq pillugu suleqatigiinneq nunani tamalaani suleqatigiinnermut pioreersunut aammalu suleqatigisatsinnut qanittumik suleqatigiinnermut tunngavigalugu ineriartortinneqassasoq. Tamannali Nunat Avannarliit Killiit akornanni soqutigisatigut ataatsimoorfiusuni oqaloqatigiinnerup ataqatigiissaarinerullu annertusarneqarnissaannut akornutaassanngitsoq.

Siumumut pingaaruteqarpoq Kalaallit Nunaat Savalimmiuni Islandimilu ikinngutitsinnik qanittumik tatigeqatigiillunilu suleqatigiinnerup ineriartortinnissaa ingerlaanneqarnissaa. Nunani avannarlerni inissisimanerput ataatsimoorfigaarput, oqaluttuarisaanermut tunngasuni ataatsimoorfeqarpugut,



aammalu unammilligassat amerlasuut pillugit ataatsimoorluta suleqatigiittarluta. Taamaattumik aamma pissusissamisuuginnarpoq toqqissisimaneq, isumannaatsuunissaq nunatullu aalajaassuseq pillugit nunarsuup immikkoortuani maani qanoq iliorluta pitsaanerpaamik peqataasinnaanarluta ataatsimut oqallisigissagipput.

Siumumiit taamatut oqaaseqarluta siunnersuut taamak isikkoqartillugu aappassaaneerneqarnissaa innersuussutigaarput.

Qujanaq.

Erik Jensen, Siumut